

東田文集附詩集
一





東田文集

附詩集

(一)

馬中錫著

東田文集卷一

明 故城馬中錫著

章疏

修人事以回天變封事

頃者言事之臣。多以忤旨被黜。遂使諫垣之臣。亦以隱默自容。他人不言。猶有可諉。臣言官也。以言爲職。乃不敢言。所職何事。下負所學。上負朝廷。明則人非。幽則鬼責。蚤夜興思。毛髮森豎。茲者新正甲夜。星變有聲。荷聖度之優容。許臣等以論列。詳盡於國家生民之利病。無懷於干冒顧忌之私憂。此卽帝堯詢及芻蕘。大舜舍己從人。成湯從諫弗咈之盛心也。臣等聞之。懽呼踴躍。如釋囚繫。十數年抑鬱之懷。乃今幸得一吐。死且無憾。而况許臣以不死乎。方今敵政如破屋然。牀牀皆漏。如痘嬰然。歷歷皆瘡。未暇毛舉。以溷聖聰。姑舉目前以奉德意。其最大且急者。曰近倖干紀也。曰大臣不職也。曰爵賞太濫也。曰工役過煩也。曰進獻無厭也。曰流亡未復也。凡今所以上廬九重之憂。曾莫出於數事之外。國政斯蠹。元氣載虧。天變由是而招。生計以之而蹙。伏望皇上俯聽臣言。無應故事。天變不消。臣等甘受磔鎖。蓋近倖之設。國初有定制。今之近倖。一何盛歟。或一監設太監一二十員。或一事參內官五六七輩。或分布藩郡。享王者之奉。或總鎮邊疆。專大將之權。或依憑左右。以援引儉邪。或交通中外。以投獻奇巧。司一錢穀。則法外取財。

而兵民坐困。貢一方物。則刑以求賂。而官吏被殃。殺人者得見原而不死。敗事者得請託而逃刑。邇年以來。如汪直、梁方、章輿、陳喜輩。不可枚舉。往往繕寫經典。布滿寺觀。進奉金玉。遍索閭閻。內耗府庫之財。外奪軍民之利。所以招天變。虧聖德者。未有不由此輩也。城狐社鼠。未易翦除。兔窟隼墉。自爲得計。惟皇上斷自宸衷。訪參國論。痛加裁抑。無干紀綱。司錢穀者革去。在鎮守者取回。遠閹寺刀鋸之餘。復門戶掃除之役。則近倖少戢。而天變可回矣。大臣者。天子所與佐理天下者也。今之大臣。一何鄙歟。其未進也。非資緣一內臣則不可。其既進也。非依憑一內臣則不安。此以財賈官。彼以官易財。是以在位之人。率皆俛首。臺閣無所建白。府部奉行文書。蓋將爲柔羅附木之不遑。豈復有砥柱中流之可仗。是無怪其百計苞苴。而轉輸權貴。二天仰戴。而官及弟男也。夫京師者。四方之則。大臣者。百僚之長。居京師爲大臣如此。則藩臬郡邑。誰不遞倣效尤。漁獵民財。假大臣以圖進取乎。是猶江河附滄海。而溝澮又得以附江河。虬龍食魚鼈。而魚鼈又得以食鰕蟹。其弊可勝道哉。如戶部尙書、兵部尙書、禮部侍郎、刑部侍郎、南京禮部尙書、工部侍郎。俱老儒無爲。刑部尙書、大理寺卿、南京刑部尙書、禮部侍郎、太僕寺卿。俱清論不愜。所以招天變。虧聖治者。未有不由此輩也。軒鶴晉鼠。任意饕餮。蹲鳳嚙烏。何所畏憚。惟皇上獨奮乾剛。大彰天討。將臣等所指實者。放歸田里。所遺漏者。許令自陳。別選剛正不阿之士。以充任使。則大臣知警。而天意可回矣。爵所以旌有德。賞所以待有功。蓋人主馭天下之具也。今之爵賞。濫亦甚矣。或無故而爵一庸流。秩超崇品。或無功而賞一貴倖。貨直萬金。雨雪天本自降也。而祈禱者得以覩美官。金寶國所不急也。而進奉

者得以射厚利。方士則以煉氣服丹之術惑天聽。伶人則以魚龍角觝之戲褻天威。以致數年以來吏胥工徒皆叨官祿。俳優聒竺或玷班資。彼所進奉不過價直百金。或五百金。至千金者少矣。此之俸給或支末品。或支優品。至極品者亦間有之。計其一年所償已數倍矣。況其年數未可量乎。臣等甚爲朝廷惜此妄費也。且一歲傳奉或至千人。數歲中則數千人矣。數千人之祿其大者歲或千石。其小者亦不下數十百石。數歲則不勝計矣。是皆國家之餽廩。百姓之賦稅也。可以養賢德。可以活饑民。乃今棄之以資冗食之徒。是誠可惜也已。况賣官鬻爵斜封墨敕皆非前代美政。皇上豈宜踵而行之。又其間方士道流如左通政等官。李致省鄧常恩輩尤爲可惡。每祈禱雨雪未效則冒天訶地詛日呪雷無所不至。偶會雨雪自降則竊天之澤以爲己功。此又招天變之甚者也。臣等願皇上克謹上天之戒。毋受小人之欺。乞敕該部各查近年以來傳奉大小官員文官不由銓選武職不由軍功者通行革去。民發當差軍勒歸伍匠著原役。官還本職。則爵賞不濫。而天意可回矣。臣等又聞閔損譏改長府漢文惜作露臺蓋不欲以不急之工役耗閭閻之生計也。今之工役煩亦甚矣。都城諸利迄無甯功。京營諸軍不遺餘力。琳宮甫及鳩材祇園又復相地。遂令土木衣被錦繡。緇黃坐享膏粱。國之所費蓋不貲矣。就中如國師繼曉假術濟私所費特甚。尤爲中外所切齒也。臣等嘗謂移此寺觀土木之所費與彼僧道衣食之所資以救分陝諸郡饑民其所活豈減富弼青州之數乎。矧此軍士皆所以備有警而衛京師者。養之使銳氣百倍猶恐有不堪用。今乃役之使僅延殘喘緩急用之豈不誤事。此尤有國者所宜軫念也。願皇上斷自一心無惑羣議內惜資

財外恤人力。將此不急之營作。可已者已之。不可已者。亦暫且停止。以待豐年。徐議其宜。仍乞借此財費。發被災郡邑。賑貸流亡。則工役不煩。而天意可回矣。近年以來。規利之徒。率假進奉。以耗國財。或錄一方書。或覓一玩器。或購一畫圖。或造一簪珥。所費不多。獲利十倍。臣等嘗求其所謂方書。不過民間醫卜輩。欺世取財之書。而點竄首尾。改易名目。所謂玩器。所謂畫圖。所謂簪珥之屬。不過民間之所有者耳。高其價直。倍蓰千萬。以自珍奇。以誑耳目。臣等願皇上洞燭此弊。屏而勿庸。留府庫之財。爲軍國之需。則進獻息。而天意可回矣。近年以來。陝西、河南、山西地方。雨澤愆期。赤地千里。井邑空虛。屍骸枕藉。雖大兵後。不若是之慘也。皇上深居九重。旣不獲目覩其事。羣臣具員百司。又不能疏舉其詳。是以流亡日甚。惠政未敷。灑淚籲天。怨聲滿路。假使一旦盜起不虞。敵伺有間。踐不毛之地。入無人之境。而我欲守無食。欲戰無兵。豈不大廬宵旰之慮乎。願皇上體仁愛之天心。憫生民之荼毒。將遞年所賞貴倖鹽課。禁其關支。仍召商中納。以資被災之處。將卽今所辦造寺銀兩。暫且假借。仍遣官齎送。以活困饑之民。則流民復。而天意可回矣。然此特弊端之大且急者。猥承聖諭。附進瞽言。惟皇上采而行之。庶幾少有補於國家生民之萬一。若夫講求至治。以圖太平。則罄竭愚衷。尙復有獻。天下。譬之人身也。人主。元首也。大臣。股肱也。諫官。耳目也。京師。腹心也。藩省。軀幹也。大臣不職。則股肱痿痺矣。諫官緘默。則耳目塗塞矣。京師不戢。則腹心疾矣。藩省荒歉。則軀幹削弱矣。人而至於腹心受病。軀幹削弱。耳目塗塞。手足痿痺。元首豈得安然而已哉。伏願皇上聽言必行。事天以實。疏斥羣小。親禮賢臣。資政治之得失。究前代之興亡。以聖賢之經代方。

書以文學之臣代方士。則必有異聞。足以廣聖學。有讜論。足以究天變。而手足捷利。耳目聰明。腹心泰安。軀幹強健。元首於是乎亦大明矣。斯世斯民。有不治且幸乎。臣愚昧。罔知顧忌。干冒威嚴。不勝悚悸。

退小人以安天下封事

臣聞天下之事。衆君子成之而不足。一小人壞之而有餘。夫以一小人。尙足以壞天下之事。况彼此附依。聲勢相倚。又非一人乎。臣謹按太監蕭敬。蔣琮。本皆刑餘小人。俘囚殘孽。粗識詩書。遂滋姦僞。能壞大事。無如此徒。蕭敬誤用於先朝。尋遭彈劾。未幾謀復於司禮。竊弄威權。幾壞朝政。海內寒心。尙賴陛下覺其姦邪。亟賜屏除。中外人心。翕然稱快。但自去年以來。仍復柄用。不知過情之譽。發於何人。而言官封章。未賜省覽。言之愈切。任之愈專。其蔣琮者。初以慧黠。得侍掖庭。頓爾生姦。自取棄外。後復夤緣內倖。得以守備南都。恃其小才。動輒妄作。人非巷伯之賢。諫竊執藝之說。因而得計。遂害善良。姦狀屢經論劾。聖意堅執不回。不究蔣琮反罪言者。夫蕭敬所掌者。朝廷箋奏之文。蔣琮所居者。祖宗根本之地。一盤據於內。以專生殺予奪之權。一依憑於外。以快恩讐報復之欲。是王氏三窟。有其二矣。天下事豈難壞哉。且自古誤國之臣多矣。其間或有顧其身家。念其妻子。至沒齒不敢爲惡者。獨宦官者。身罹薰腐。性異士夫。室無妻孥之可樂。故利勢以自娛。後無子孫之可懷。故敢爲而無忌。然猶幸其不事詩書。罔資奸僞。徒知貪欲。而不知害忠良。徒知怙恩。而不知竊權柄。使或小識之無粗知章句。則必至於升國監而講易。豈復有能下蠶室而述史者乎。蕭敬蔣琮。殆近之矣。釋今不治。後將噬臍。臣恐天下之事。不足二人壞也。伏願皇上以

天下爲念。以小人爲防。不惑羣議。斷以宸衷。將蕭敬退還裕陵司香。蔣琮取回海子管事。戒其勿與士夫爲仇。勿再夤緣用事。不惟陛下於宦官能盡保全之道。而蕭敬蔣琮亦得永保其首領於將來矣。臣意切直。干冒天威。罪當萬死。雖就磔鎖。所不敢辭。臣不勝拳拳爲國之至。

糾劾宦官尙銘封事

臣聞義莫大於忠君。而欺君者義不可容。法莫重於治姦。而黨姦者法難輕貸。此大易所以預履霜之戒。春秋所以謹正月之書。竊照太監尙銘。沐聖朝之殊恩。受機密之重託。正宜夙夜匪懈。始終不渝。而意驕志遂。心險貌恭。作福作威。無事生事。竊朝廷予奪之柄。負皇上簡任之明。置東廠所以防奸邪。而反引誘奸邪。設官校所以察貪惡。而反黨比貪惡。勘事巡按之官回。而預索揭帖。傳報聲息之使至。而先漏邊情。來朝之藩臬守令。率有苞苴。在邊之文武臣工。巧索饋送。私門大啓。賄賂公行。迎合者大惡亦容。鯁直者小事必舉。縱官校以羅織平人。因私忿而誣害良善。人心日懼。氣餒日隆。干進者跪拜其門。有罪者納賄其室。陞官加秩。不知所由。赦罪宥愆。不顧於法。巧僞相扇。奔競成風。王化以漓。士俗日薄。邇者地道之變。未必不由於此也。茲荷皇上明見萬里。洞燭羣情。已將尙銘摘發其惡。籍沒其家。資財積如高山。罪僇數於擢髮。人神胥悅。中外快心。夫受賂者既有迹。而納賂豈無其人。若不逐一查究。痛加懲治。則奸邪得以僥倖。正直無以自明。如蒙伏望皇上。去邪勿疑。充類盡義。將尙銘拏到之日。鞠問追究。納賂者何人。夤緣者何事。通行拏問。明正典刑。使姦惡有所懲。良善知所勉。士風可瀉。地變可消。而太平可致矣。臣待罪言。

官不敢緘默。

糾劾宦官黨惡封事

臣頃言太監李榮等黨附尙銘乞賜斥逐荷蒙皇上曲加聽從別爲處置雖未卽赫示顯誅諒亦不復顯用矣。古帝王納諫如流何以過此。臣又聞尙銘昔在東廠弄權臣工率傍門求幸名節盡墮苞苴爲計自謂手炙而可熱不思膝屈而難伸以致尙銘貨積如山富堪敵國未必不由各官趨諂以長其奸附益以速其禍也。今尙銘已加嚴譴各官乃爾優容是無事時則搖尾之狗乞憐有事則吞舟之魚見漏正直解體儉邪肆姦臣竊恐百職效尤有傷治體四方傳笑有累聖朝若不痛加懲治何以警戒將來是以臣昧死再言不能自己如蒙伏望皇上乾剛獨斷離照旁加或鞫問其親信或追究其簿書要見納賂者何人資緣者何事通行拏問明正典刑庶使黨惡者有所懲而受賂者不偏罪矣。

陳言消變封事

邇者天時亢旱憂及齊民皇上側身修行不遑甯處旣又降敕求言冀回天變此與成湯六事自責者異世同符其視漢武帝乾封之說不可同日而語矣。臣雖愚昧莊誦聖言不勝感激謹陳鄙見仰答天休億豪采納感幸何如。臣聞之書曰人惟求舊蓋舊人者老成持重慮遠憂深其於國家之事閱歷已多諳練已熟是惟無用用卽奏功如老吏按獄曲直莫能遁其情老將提兵勝負莫能逃其算觀於唐肅宗起用郭子儀以靖至德之難宋哲宗起用司馬光以成元祐之治可見矣。臣竊見太子太傅兼吏部尙書尹旻

爲人威重。才識變通。典選精明。持身廉慎。迹其在任。幾四十年。自始至終。略無過舉。求之古人。蓋有裴楷之清通。而又兼裴行儉之藻識。因其子尹龍註誤。遂至罷官。朝野至今惜之。臣以爲古人父之惡。尙不能廢其子之善。然其子之惡。又豈能廢其父之善哉。况其人年力未衰。康強如故。苟蒙錄用。未必無補。伏望皇上軫念舊臣。自今以後。端揆有缺。起而用之。俾得自新。以圖報稱。則登明選公。衆正相慶。陰消陽長。和氣可召。亦消變之一端也。又竊見前太子太保兵部尙書兼都察院左都御史王越。一代奇才。干城可寄。求之目前。誠不易得。况其人經事累朝。多歷年所。積有勤勞。方陞前職。使其能自慎重。以保功名。則雖與唐之李藥師。宋之范希文。較功爭能。亦可伯仲。奈自威甯海子用兵以後。驟陞伯爵。致招物議。頓爾除名。今茲尙存。亦未衰老。臣以爲古人功過不相掩。今豈可使其人獨受夫過誤之罪。而更不議其往昔之功乎。伏望皇上軫念舊臣。憫其犬馬之勞。不棄帷蓋之弊。革其後項所得武職伯爵可也。其前項所有文職官銜。乃其數歷中外。得自朝廷陟明旌淑之典者。特賜光復。俾得徜徉林下。以終餘年。如其可用。簡在帝心。則賞罰昭明。功過不掩。臣下知勸。百工允釐。亦消變之一端也。臣見同坐井。罪犯言高。謬陳求舊之偏辭。少助弭災之至計。臣不勝戰慄待罪之至。

陳言封事

臣聞天下之治忽。其幾甚微。而其發甚大。其壞於小人也常易。而集於君子也常難。故陳蕃諸賢。不能重扶漢鼎。而林甫獨相。乃至卒亂唐室。司馬光范鎮諸君子。遇神宗勵精圖治。羣起輔之。尙多扞格。一王安

石壤之卒。釀靖康之禍。正邪進退之際。天下安危之幾也。可畏哉。恭惟陛下嗣位以來。黜左道。用正人。開言路。塞倖門。其於君子小人之進退謹矣。然君子雖進。未必無遺珠之恨。小人雖退。未必無滋蔓之虞。臣請爲陛下試言之。願陛下察臣愚悃。而試聽之。然後抵臣於罪。據法而論之。臣罪不敢辭。死且不朽。臣自爲諸生時。聞朝臣有所謂王竑者。忠貞公亮。勇烈抗直。在正統未乘輿播遷。旣嘗廷擊大憝。在成化初羣閹竊柄。又嘗力辭要津。求之古人。可謂有汲長孺之戇。而兼申屠蟠之見幾者矣。臣以爲陛下求舊人。輔新政。宜莫先於竑者。今乃遲之數月。言已累人。卒未起用。其故何與。意者同列忌其賢。而不欲其同升耶。或近倖銜其怨。而不爲之延譽耶。抑陛下去竑之日久。尙未知其人而漸忘之耶。不然。何當用而不亟用也。他如尙書尹旻。居官清謹。而選事亦頗練達。大學士劉珏。才識明敏。而爲人亦頗剴直。然自昔至今。皆爲權姦所忌。搆以他事。中以危言。諷臺諫使攻其去。假詔旨以杜其來。使之齎志林泉。終身不白。陛下豈宜槩棄。而不一軫念錄用乎。夫耳目所擊者。類尙如此。則聞見未逮者。又復幾何。臣所謂遺珠之恨。以此臣筮仕來。遭際聖明。內除讒宦。外屏姦臣。天討允愜。於輿論。而憲綱尙漏於吞舟。如兵部尙書某者。鼯鼠其技。虎狼其心。昔守西安。括取民財。厚遺朝使。沾其延譽。享之終身。次撫延綏。則邊牆之修。不減於蒙恬。長城之過慘。及總制三邊。則墩臺之築。何異王欽若閉門之可羞。方且恬不知恥。斥去復來。臣以爲陛下初政所宜退。莫有先於此者。今乃遲疑濡滯。屹乎有聞。而卒未聞也。豈在廷之羣臣。皆不逮其才與。或在野之士。不復有其人與。抑其人奸邪如杞。譽言如阿。而陛下卒難知與。不然。何當去而不亟去也。其他如

大學士某之姦邪。某之貪濫。都御史某之老儒。尙書某之剛愎。已遭斥矣。不尙有其黨與乎。今朝列之中。由臺省以及監院。自郎署以汝大僚。雖皆先帝舊臣。尙多姦邪餘孽。暫能革面。終不革心。似此庸陋。何益於國。然又首惡者具招在官。言事者屢陳於疏。陛下何乃愛惜之甚。而不忍斥去乎。夫稂莠不除。終能害穀。死灰復熾。猶可燎原。臣所謂滋蔓之虞者以此。伏願陛下斷自宸衷。毋搖羣議。任賢勿貳。去邪勿疑。將王竑等起而用之。則君子畢集。可以共成天下之事。將某某等屏而勿庸。則小人退聽。無復更敗天下之事矣。若再因循不決。下之該部。則嫉賢妒能者。多必辭抑沮。而君子終無可進之時。若再念其爲先朝舊臣。姑留辦事。則包羞忍恥者。必伺時竊發。而小人終無可退之理。故臣嘗考於遠古。元凱登庸。則君子彙進。而野無遺賢。四凶誅殛。則小人盡去。而朝無佞位。所以堯舜之德。蕩無能名。唐虞之治。卓不可及。假使當時元凱有一之或遺。四凶有一之幸免。雖於堯舜之德。無所虧。而於唐虞之治。恐或病也。誠以調停之說行。一薰一蕕。善齊者不能同其器。薰且不勝於蕕矣。朋黨之禍作。一鳳衆鸚。善象者無以措巧機。鳳且見忌於鸚矣。不特凶邪蟠據。未易剪除。而俊良登崇。徒爲故事。臣之愚忠。實爲此懼。臣不勝拳拳。

代李伯起言時政

臣奉命按陝。身奔走於外藩。心常馳於魏闕。偶有所見。思罄狂愚。况懷隱憂。敢辭斧鉞。蓋自去年以至今日。自京師以達四方。水旱相仍。災異疊見。言官屢遭於謫斥。封章未荷於施行。衷有所激。情莫能已。謹陳三事。少裨萬幾。伏惟俯賜省覽。則愚臣幸甚。天下幸甚。天變可畏也。人言可恤也。祖宗可法也。臣惟君者。

天之子。天者君之父。父之於子。有不善懲戒之。懲戒之而不改。則辱身墜家聲矣。惟天也無言。人君有不善。假災祥以譴告之。譴告之而不省。則安危及宗社矣。邇來天心垂愛。災變相仍。固宜仰答至仁。痛爲抑畏。而陛下之所以回天變者。徒事虛文。率臣工者。竟爲故事。下詔與百官同加修省。聖心無警畏之誠。官僚無貶損之節。深宮之逸樂自如。臺省之放恣未戢。詔雖下。猶不下也。云修省。未修省也。以此欲回天意。不亦難哉。譬之子有不善。父或怒之。乃給其奴僕。共加改行。實未嘗改。而奴僕亦因之不肯改。其父之怒庸可已乎。今天出災祥以告陛下。陛下正當上體天心。下省人事。遇地震則曰。地何由震。將多事以累於靜耶。遇日食則曰。日何由食。或陰盛以虧於陽耶。遇彗孛則思妖不可以勝德。遇水旱則思變無使於勝常。他如聖學未講。聖德未修。初政有漸息。君子有未進。進而委任。或未專。小人有未退。退而萌蘖。或尙在外戚之爵賞。或驟且濫。內宦之寵任。或衰復盛。詳以思維。而痛爲刮去。庶幾天意可回。人心允愜。陛下或謂不然。曲聽左右之言。仍踵宿昔之弊。或推咎於臣下。或有事於禱禳。臣見去道愈遠。回天愈難矣。且左右附會者。必曰。天道茫昧。災異之來。非爲一人。今與百官同加修省足矣。是特以分陛下之憂心耳。殊不知憂心緩則怠心生。又必曰。修省回天。其說迂闊。彼佛力道術。或可救厭。於是禱禳之事興矣。是特以紓陛下之懼心耳。殊不知懼心釋則侈心生。怠心生者。百善可墮。侈心生者。百不善可作。其流弊不至於以天變爲不足畏。不已也。臣再思之。天子之有天下。猶庶人之有其家也。庶人之家。或鴈集於舍。或犬噪於垣。或鬼憑於人。或釜鳴於竈。有不招大害而致大災者乎。遭之者有不狂叫奔走。悔過遷善。以祈解之者。

乎。有天下者。乃反怠於善。侈於不善。以玩天變。而不之畏。是烏可哉。臣愚昧無知。不能推明天道。遠引故實。以獻陛下。惟願陛下以一得之愚。納臣言。以庶人之家視天下。則幸矣。仍乞敕厲言官。勿爲畏忌。遇有天變。務須直言。陛下詳閱封章。躬自省覽。毋付左右。以代聖裁。務受盡言。以旌直節。其事難處。分文難剖。析當與內閣及文武大臣。可否論思。不宜謀及讐近。以虧至治。庶幾骨鯁之士敢陳。而弭災之道可得。蓋朝廷之設言官。所以決壅蔽而廣聰明。故聖王之於忠臣。恆以託心腹而寄耳目。陛下卽位之初。深知此意。固嘗坐屈羣策。大開言路。下僚之狂言無忌。旣薄其事。而先朝以言去官。特加錄用。下情漸達。士氣頗張。馬羞立仗。鳳效鳴陽。行止騰謠。貴戚斂手。天下之人。欣然相告曰。不圖今日。復見謗木諫鼓之風。破柱埋輪之節。夫何一二年間。頓然中改。賜還之澤。未溥。及於逋臣。盡網之誅。又驟加於正士。以爲出於宸斷。則於言者。前何容而後何不容。以爲牽於多門。則於讒者。後何信而前何不信。是必有其故矣。而臣未能得也。惟陛下靜以思維。反而審察。忠言聽。讒言拒。則天下治。塞諤退。萋菲進。則天下危。差失於一念之轉移。而究竟於萬幾之叢脞。其流弊不至於以人言爲不足恤。不已也。且誰無爵祿之可懷。誰無身家之可顧。誰不畏敲扑之威。誰不憚降謫之辱。而放言取禍。甘心以罹者。豈有他哉。彼亦誠知受君上之深恩。不敢負。畏身後之譏議。不少貸耳。譬之盜賊將劫主財。奴聞於道。有不奔告於家者乎。傭保或敗翁事。子偵而知。有不密言於親者乎。不然。則負恩庸奴。債家敗子。人孰不唾罵哉。又况爲臣者乎。未必盡才。而才者亦多未肯以自盡。賞之使言。猶有懷爵祿。顧身家。不肯盡於言者。而况敲扑降謫。使人懷疑貳。懷畏懼。遞效

循默乎。臣恐將來有殃民之政。誤國之徒。亦無人肯爲陛下言矣。且今之所謂言官。六科十三道耳。一貳於封駁。一雜於刑名。其職固已不專。而其所言。又或暫容條拒。陽善陰怒。而不見信。則彼亦安能盡其職業。立殿陛以可否天下事乎。職不盡於下。言不信於上。則君子將日消。小人將日長。政事將日壞。禍患將日生。譬有人焉。自塞其耳目。而使一物無所見。一步不可行。乃欲出門以登高望遠。其不至傾跌狼狽者。幾希。乞敕吏部。備查先朝及近日。大小官員。以直道直言獲譴。而以他事他辭去官者。疏名上請。降謫者。收錄之。量移者。超遷之。投閒置散者。起用之。從戎除名者。別白之。如此。則人言以恤。而下無私議矣。開創之始。萬變俱當究心。故祖宗之法。萬世所宜遵守。書示監于成憲。詩言率由舊章。聖人示人。斷不可誣。我太祖皇帝。大造乾坤。太宗皇帝。再清海宇。立法垂訓。文謨武烈。所以爲聖子神孫慮者。至深遠矣。不承於文謨。敬承於禹道。百世不遷。萬代如見。是豈非聖子神孫之所當恪守者乎。臣愚未暇悉陳。姑舉其一。高皇帝起自白衣。周知閭閻之事。然猶日接羣臣。以論政治。文皇帝起自藩國。備諳上下之情。然亦日接大臣。以咨謀議。今上徵國典。下撫羣言。載於誥敕卷書。見於詩文銘誌。往往見二聖之於臣下。或親臨直廡。或召對便殿。或燕遊許陪。或應制有作。藹然唐虞都兪之風。而熙然家人父子之語也。臣上窺聖意。不過欲通上下之情。決壅蔽之患耳。蓋上下之情通。則知有天變。知有人言。讒諂無自而進。聰明無自而昏。弊端無自而生。奸宄無自而起矣。壅蔽之患作。則讒諂日進。聰明日昏。弊端日起。奸宄日生。天變將不足畏。人言將不足恤矣。夫天變不畏。則天曷相之人。言不恤。則人曷戴之。此固位之臣。持是說以希合。而季世

之君。卽此道以取危亡。而竟莫之悟也。我祖宗睿識遠見。所以貽厥孫謀者。甯有窮乎。迨及宣宗皇帝時。則有大學士楊士奇。尙書蹇義諸臣。英宗皇帝時。則有大學士李賢。尙書王鏊諸臣。不時進見。相與講求軍民利病。可否四方奏疏。以故宣德之初。人樂太平。天順之際。治稱明盛。至今以爲美談。而閭閻尙懷追慕。蓋自成化以來。先帝狃於承平。厭接臣下。而尊卑遂至闊絕。末年弊政。百孔千瘡。幸而龍飛御極。虎變炳文。陛下以神聖之資。守祖宗之業。咸有一德。於茲四年。大廷之朝。雖無間於寒暑。便殿之召。終未及於臣僚。經筵僅一暴矣。退而寒之者至。賢士僅一傳矣。引而咻之者多。如此不已。安知將來不有以深拱禁中待事之謀。及勿使親近儒生之術。誤陛下者乎。此臣之愚。所以必欲陛下法祖宗。以通上下之情也。今中外諸司。皆祖宗所建。以佐陛下治天下者也。譬之作室者。必用匠。卽鹿者。必用虞。舍之。何以成室而得鹿哉。臣伏望陛下會朝之餘。日御便殿。接大臣以論思。藉嘉言以啓沃。省一奏。則與共論其事之可否。遷一官。則與公論其人之才德。行賞相與論其功能。行刑相與論其情罪。兵威未振。與論練兵之道。民事未勤。與論安民之術。中外臣僚。則論其執忠而執佞。左右近侍。則論其宜親而宜疏。國何如而後安。與論久安之策。國何如而乃危。與論持危之方。於天變。則與論其致之之由。與其弭之之道。於人言。則與論其納之之是。與其拒之之非。如此。則上下交而志同。君臣得而化行矣。不然。深居九重。中決庶務。親宦官宮妾之時多。接賢士大夫之時少。則是手足腹心之視。無夫一體之親。而大廷咫尺之間。如隔萬里之遙矣。君有魚水之情。下何由而知。民有葵藿之情。上何由而鑒。君臣扞格。情志未孚。譬之人身。列其贅矣。豈能久。

存哉。前代人君不與臣下相接。惟秦二世與唐敬宗。此豈宜爲陛下道之。以辱聰聽哉。往迹相觸。有激於中。臣之告君。不敢不盡。故昧死援及之耳。乞敕在廷之臣。許賜清閒之燕。百司庶府。旣奏對於奉天門。而庶績萬幾。仍備議於文華殿。部院卽入。科道隨之。以準前代諫官入閣故事。如此。則上下之情旣通。而天下之治可必矣。是則爲治之道。在於畏天變。恤人言。而畏天變。恤人言。又在於法祖宗。接臣下。惟皇上留神采納。臣無任惓惓。

代李伯起陳便宜六事

臣按陝將滿。問民疾苦。察吏貪污。仰體聖仁。下革姦弊。不敢少有遺力。孤陛下任使之心。然目擊耳聞。尙有憧憧於懷。而未能自己者。亦皆軍國重務。關係匪輕。開具於後。上塵聖覽。儻賜采納施行。地方幸甚。生民幸甚。臣不勝拳拳愛國之至。一沿邊糧草。所以助軍興。增敵愾者也。姦弊苟不能除。則邊儲何由得實。臣竊見榆林。甯夏各營堡。糧草多者。僅數萬石。少者纔數千石。承平坐食。或僅足以支給。有警調發。將必至於匱竭。豈不悞事。揆厥所原。積非一日。蓋大利獨擅於權豪。故弊端積生於出納。今各營糧料乾潔。草束新鮮者。皆出自地畝。州縣之賦稅也。糧或粗糲。爛草或斤數短少。皆出自銀買。權要之中納也。惟賦稅故精美。惟中納故濫惡。且其上納之時。遇賦稅則納者。無勢力可恃。收者無關節。以通。曬晾必足。篩簸必勻。席藉必厚。斛面必多。以故軍士關支。多得實用。銀買中納者。非炙手可熱之赫威。則薰天可畏之勢。饑餓。要其所納者。米糲粃糠。草襯渴腐。或扣除在廩月糧。而以陳作新。或賤買在場舊草。而指垛作數。視軍